

四庫全書

史部

欽定四庫全書

三朝北盟會編卷四十七

宋 徐夢莘 撰

靖康中帙

起靖康元年五月五日庚午盡二十五日庚寅

五月五日庚午詔勸士民以財穀助軍興詔曰朕嗣承丕緒夙夜兢惕思所以撫綏四海惠養元元以為無窮之計而兵戎弗靖未能偃兵故將起天下之師以振國

威然而興師十萬日費千金方積弊之後朕痛自刻勵  
罔敢汰侈罷斥浮冗粗給經費其於師旅之用誠未有  
贍之也昔漢武帝募民入粟塞下而師賴之濟今朕上  
為宗廟社稷之重將以定中興之業下為兆億蒼生之  
衆將以圖休息之期此忠臣義士協濟艱難之秋也應  
天下士民上戶有能推其財穀贏餘以佐軍興者仰州  
縣聽其自願不得抑勒不以多寡別項儲蓄專以充募  
兵養士費其數申樞密院各以名聞朕將等第推恩以

為忠義之勸

八日癸酉河北河東宣撫司乞招兵以防秋河北河東  
宣撫司言河北諸州正兵闕少以禁例物於陝西募遊  
手惰民充義勇五路各四千人可趨防秋從之仍令尚  
書省撥降銀絹 蔡攸移潯州安置臣僚上言臣聞善  
除惡者如去草之絕根不善除惡者如養虎之遺患其  
為禍福非不較然易見自昔人主有幾失而莫捄者依  
遵牽制坐視不忍決也臣謹按蔡攸大罪有七其小擢

髮莫數不復道也以樞密之臣為俳優鄙賤之事淫言  
媒語巧發應機怪服異裝排謫猷笑出入禁闈遊處冒  
男女合避之嫌犯君臣至嚴之分閭閻不限堂陞陵夷  
攸之罪一也盜柄驚恩援引死黨父子兄弟自相戈矛  
伐異黨同門分越楚及京謫衡州有旨令攸隨侍自當  
聞命就道乃頓跡滎陽積日不發既不順于其君復不  
孝于其親攸之罪二也朋比中官握臂交膝昵比恩私  
互輸誠款推挽呼吸相助攸之罪三也幽燕之後開豐

啟兵以方爭為恢復以並擾為撫定以營平檀之地捐  
之金人不念土地實為國寶且公肆誕謾以為不世偉  
績酬功之際超取上賞國公帝師一舉而委之偃蹇傲  
睨居之不疑攸之罪四也金人渝約詭謀已形藥師背  
恩逆迹又著帥臣將校章䟽迭來自去年秋杪中朝士  
大夫切切私語知禍必至而攸帷幄謀臣邊機在手縱  
使不敏覩形亦悟而秘藏覆匿不告于朝惴惴然惟恐  
前日罔功冒賞姦迹呈露至使金人藥師助叛畿甸為

金史卷之二十一  
之繹駭兩路懼其荼毒聖主宵旰生民瘡痍伊誰致之  
攸之罪五也攸既有必至之禍不告于朝不謀于君上  
矣乃且汲汲為妻孥念其家所蓄器皿若金銀首飾之  
類先自銷鎔為輓裝計及敵將至捲室而東去襁褓之  
子苟可愛者悉携以往猶偃然肆言曰得旨扈上皇駕  
縱使當時懇告得命亦合留家屬京師與國分憂臣頃  
在外州見潤州人來云六夫人某日出某寺觀燒香六  
夫人與詔使待制詔使修撰某日過江而去蓋攸之妻

與子也。回之日寔二月二十四日在上皇渡江回鑿之後避危圖安反覆熟慮直於是夫為君為宗廟社稷為百姓謀其忽如彼為妻為子為婢妾計其審如此人臣不忠復有甚于此者乎。攸之罪六也。上皇既傳位陛下則陛下神明之主矣。凡戴天履地而為人者孰不稽首曰吾君也。況為輔臣乎。況前日職在樞機樞機寔本兵柄曰戰曰守此實司之可須臾離乎。今外州都監小邑縣尉敵至而遁比之他官罪固加等。若廟謨兵機所



寄先衆而適其法當何如哉攸之罪七也攸有七罪寔天下共知不獨微臣言之其前四罪縱付輕典在祖宗時亦合投荒其後三罪則匿兵秘禍殘我生民恤身謀家忘我祖宗蔑君臣之義擲大兵之柄自古人臣有此之大惡其可復容于覆幬之間乎若不早行誅殛其如祖宗何其如天下後世何昔唐五王不誅三惡陷唐室以再亂曾不知桃上之蟲若羽翼復生潛飛深宮大肆吞噬可不戒哉攸之女媼猾詭秘公卿大臣有墮計中而

不悟度其一二年必有為游說如許及門旋遂造室廟  
足有地姦計即行鈎引支黨同惡共濟蕭牆之禍事出  
意外是時愴悔哀痛噬臍何及臣愚欲乞陛下大明典  
刑以絕後姦如散官安置湖外之類誠不足以塞天下  
之紛紛取進止五月八日奉聖旨可移潯州安置

九月甲戌种師中敗于榆次死之河北制置使种師中  
軍于真定樞密許翰怒其不進下書一日六七至有逗  
遛玩敵之語且責必解圍太原贖罪師中至平定軍乘

勝復榆次諸縣師中屯于壺林去榆次三十里金人乘間來突諸軍以神臂弓射退之師中欲取銀賞軍而輜重未至故士心離散初師中約姚古張灝兩軍俱進師中屯于榆次之境而古灝不至甲戌金人羅索兵來攻右軍右軍先潰前軍亦奔師中率麾下死戰自卯至己所餘纔百餘人身被數鎗裹瘡力戰又一時而死之年六十八姪沔招魂奉柩至京師上哭于禁中親製祭文云吁嗟虎臣公爾忘身遣內侍張實致祭贈嚮德軍節

度使開府儀同三司官其子孫族屬二十人功德院賜  
名旌忠二字潛潛師中既死朝廷議失律兵將之罪中  
軍統制官王從道朝服斬于馬行市副統制張師正統  
勝捷兵方屯大名劄下知大名府李彌大斬之衆遂潰  
後為韓世忠招降者是也 封氏紀年曰先是師中被  
詔以兵護送大金令歸至大名府復被詔以所統兵救援  
太原遂自天長登平定軍至壽陽縣凡數百里間未嘗  
見一金人師中以為金人知師至悉以遁去而我師肆

行未嘗被堅執銳五兵之具悉委僉負之將至石坑有  
報前軍已到石橋至太原止二十里中軍至石坑軍壘  
未屯有報榆次縣路金人兵馬將至師中曰必金人殘  
零將歸者令後軍去收捉轉刻之間金人大至我兵未  
措手聞鐵騎來衝奔潰被傷不可勝數師中遂歿幸脫  
兵將十無二三矣 節要曰金人圍太原多於汾潞兩  
路以拒王師蓋王師時在汾潞也不謂師中由平定出  
關一旦去太原不遠一舍敵衆驚惶謂自天而下師中

所失者既不能乘其不意攻其無備以破之則當急趨太原薄賊而壘與張孝純王稟之軍相為表裏彼兵以尼堪之徒遠去而王師已到太原必不敢越太原重兵拒汾潞之師也由是汾潞之師自可進至太原則太原之解必矣而師中至是自謂孤軍深入復懷怯懼迴趨榆次為羅索所衝大敗死之自敵入攻兩河河北更無一戰河東大小雖有數戰惟孫翊折可求种師中之戰有可以與敵相持勝負之理至于敗也誠可惜之故臣皆

有說焉其餘焦安節敗于圍柏冀景敗于交城楊志敗于孟縣解潛敗于南關范瓊敗于介林劉韜敗于平定張灝敗于郭柵皆望塵而走或交鋒而退無足紀也靖康小雅曰公諱師中始斡里雅布既盟城下擁衆北還詔遣公將精甲三萬尾襲其後敵迄出塞不敢肆暴因令公留屯真定未幾趨公援太原時許翰同知樞密院事昧于兵機以峻文繩公不容頃刻公方欲規畫所宜并待餉饋稍給方乃鼓而西翰督責益急公太息曰事之

不濟天也吾何愛一死不以報國耶乃由土門下井陘  
至榆次金人先屯兵縣中公遣擊走之遂入縣休士時  
軍中乏食三日矣戰士曰給豆一勺皆有饑色翌日敵  
遣重兵迎戰招安巨寇楊志為選鋒首不戰由間道徑  
歸前軍叅謀官黃友戰沒敵騎四集官軍潰散公獨與  
親兵小校數百搏戰左右以名馬援公請俱遁去公謝  
之曰吾大將也事至于此不當求生爾曹亟去無嬰敵  
鋒公遂力戰而死嗚呼古者間外之事將軍制之然後



可以責其成功趙充國百戰老將猶曰百聞不如一見  
翰腐儒不知兵多妄意遙度迫公使前不容措置又以  
餒餓之軍當素飽之敵非戰之罪也既不得盡其折衝  
之畧獨有一死以明其忠則公之死可不為之大哀耶  
詩曰金入晉陽帝為旰食欲摧其牙乃屬勲力狂生誤  
國不假頃刻賞無見糧進非乘隙公能死綏以明忠赤  
休有耿光耀而不息 中興姓氏曰种師中字世儒師  
道之弟也以世廕嘗歷秦州司戶叅軍授內殿承制環

慶路第一副將擢知寧州邠州德順軍環州守環十二年所至皆有治聲大明府路兵馬鈐轄知濱州後除河東路提舉保甲繼為環慶路馬步軍副都總管從破夏人成德軍加龍神衛四廂都指揮使房州觀察使方童貫用薛嗣昌等欲攻燕師中謂貫曰公此行得非以燕事乎貫曰無之師中賀曰幸甚朝廷政事大弊軍律不嚴浙民苦官軍之擾過于方臘方虞蕭塙之禍反用嗣昌之輩而欲僥倖契丹耶貫又曰無之後移師中為燕

山路總管尋以不稱職降開州防禦使提舉亳州明道  
宮後起為環慶路經畧使宣和末加崇信軍承宣使秦  
鳳路經畧大金入京率兵來勤王而大金已退師中見  
上上雖有以敵深入不擊為失策然不敢決策出戰  
加河北制置副使凡行移文字出于樞密者則令追  
破敵出于三省者則令護出境莫之適從師中渡河  
上疏言尼堪兵已至澤州以後路允迪到尚須旬日若許  
臣自邢相間徑取上黨攻其無備破之必矣朝廷駭焉

許翰逼之進兵遂至于敗 傳信錄曰尼堪兵圍太原詔  
种師中率兵由井陘道與姚古犄角應援太原師中進  
至平定軍乘勝復壽陽榆次諸縣不設備有輕金人之  
意又輜重犒賞之物悉留真定不以從行金人乘衝突  
諸軍以神臂弓射却之欲賞射者而行司銀盃祇數千  
秋庫吏告不足而罷於是皆憤怒相與散去師中為流  
矢所中死之其餘將士退保平定軍 靖康前錄曰先  
初二日之戰雖平仲輕挑失利然以四千人夜襲其堂

堂之陣敵亦緣此稍慎初六日猶以三千鎧騎渡汴河  
西王淵率萬人夾河放神臂弓敵再却而坐射死者六  
七百人自知勢非前日之比遂決意北歸乃進兵南向  
識者知其為遁去之計廟堂諸公方大恐懼又增送金  
銀繒練其車相望于道初七日康王歸自敵營肅王繼  
往駙馬都尉曹晟侍行初九日韓里雅布縱火焚其寨初  
十日北去嗟夫种師道之來既不獲設施于城下賊退  
之日种師中以三萬騎尾其後俟半渡而擊之十一日

敵兵去絕此亦發兵隨往是夜有旨取种師道制度收  
兵還京議者罪綱之貪功妬能而為此遂使二种重兵  
遠來不克畧行其智識者為此扼腕敵既退語於衆曰  
料南朝商量亦須經月方有定議乃置玉帛子女于中  
軍以諸國兵衛之驅擄之民在左右兵騎為殿按轡徐  
行殊無懼色後數日朝廷遣馬忠范瓊防送又數日令  
种師中以二萬騎屯滑陳兵河上不得輒度西兵既遠  
來而不獲逞衆口喧然种師中擅發三千騎過河繼而

得旨盡行至趙而及之密院再追三將兵回河上敵復抄掠所過之邑及被旨許令追襲而敵之輜重已出境矣三將追至真定敵雖未行吾之大軍往復奔馳疲薊之甚豈可接戰所以僅能驅追出界非諸將之罪也若于是時就真定犒設降詔諸將諭趨并門誰不效死彼廟堂諸公曾不推原功罪貶師中之秩使自效以贖過一如待姚古者此所以取榆次之衄也 奉使王雲回至闕下言金人欲得三鎮罷兵吳敏不從罷雲報使先是

朝廷以姚古种師中黃迪敗歟乃遣王雲入使金國至是日雲至闕奏上皇言金人亦頗厭兵只要三鎮租稅效闕南十縣舊例限半月復到燕山仍要坐到稅租歲計銀絹數目及要三道使命往三處詔諭從所請即便解兵仍不得爽約雲日夜奔馳凡六日至京具奏上大  
喜顧問羣臣可否而雲與太宰吳敏素不平遂沮雲請朝廷既不從請遂差雲出知鄧州雲再三論列利害言朝廷既嘗許三鎮誓墨未乾豈可變盟令韓里雅布俯從



雲言云中國非金人所處之地譬猶吞舟之魚蕩而失  
水則蟻能害之吞車之獸介而離山則蟻能嚙之盖居  
非其所也然貴朝所以欲三鎮二十州者雖得其地不  
過租稅而已不若效闕南之地令南朝歲上稅租此萬  
全之計也雲數請求乃肯從說願相公熟議敏曰斡里  
雅布既與主上立盟回戈之後反陷隆德掠我子女焚毀  
廬舍是金人先已渝盟三鎮不與固以宜矣雲曰雲嘗  
語此於斡里雅布斡里雅布云尼堪所領我之後軍後來應軍

期所過州縣不伏即攻隆德府過澤州尼堪未知兩國  
講好後既得我令旨及貴朝移文即便北去太原專候  
交割之使雖間有劫掠之事乃邏卒爾兩國必欲講好  
小事勿論雖租稅之請自有部籍早上其數雲即還朝  
敏曰公為中國臣子堅為敵人耶主上已嘗降詔諭天  
下百端沮雲不報

十三日戊寅道君還闕御紫宸殿受賀道君皇帝還闕  
有旨太上已還宮可擇日御紫宸殿百官稱賀

十九日甲申姚古兵潰于盤陀太原圍急先是詔諸將解圍河東置制使姚古及副使种師中探知金人兵少不知其詐也於是古將兵六萬師中將兵九萬約古自河東師中自河北日行四十里赴太原古至威勝軍師中慮古先到成功乃日行八十里金人探知以輕兵拒峻使古不得進以重兵迎師中師中敗于榆次死之金人進兵迎古遇于盤陀王師皆潰裨將焦安節在威勝軍虛傳金人且至勸古退至隆德府又勸古遁去

二十五日庚寅詔求習武藝知兵書人詔諸路軍州府  
監有習武藝知兵書人仰知通不限數保明解發赴闕  
朕將親策于廷量材拔用其籌策深遠藝能絕倫當不  
次升擢在京武學生仰禮部擇日考試具等第以聞不  
係在學人亦許自陳收試策弓馬優異與推恩其大中  
大夫及侍從官至路分都監以上奏舉武舉人依法施  
行六月十九日太常寺主簿劉定言伏覩近有旨令府  
州軍監有習武藝知兵書人並解發赴闕親策于廷切

惟武藝之人間有不知書者州縣慮其不文無以應大  
庭之間不敢解發願詔中外武藝精強而不知兵書者  
令付所在投狀州縣閱試別作一項解發殿前司按試  
藝能使之前詣邊陲收立功效以稱疆邊却敵之用從  
之令殿前司候解發到按試武藝精熟人於崇政殿引  
呈 賜劉韜束帶戰袍勅劉韜屬者金人入侵神人共憤  
頓兵朔部意在三關賴卿智謀能止畫界之吏不墮強  
敵計中而遁迹訖用安堵函封來上朕甚嘉之唯功難

成唯時易失勉奮忠力庶保令名其體朕懷勿辜眷屬  
今賜卿金帶一條金花戰袍一領茶藥合各一銀金合  
至可領也故茲親筆示諭想宜知悉夏熱汝比平安好  
遣書指不多及 曉諭潰散將佐指揮勅中書省刑部狀  
錄河北河東路宣撫司使劄子河北東路宣撫司使奏  
勘會种師中下潰散統領將佐使臣已降指揮並與免  
罪限十日首身軍前自效如限滿不來出首並依軍法  
施行近據都統王淵申捉獲潰散使臣忠訓郎杜義及

雲檀將弓箭李及所騎官馬出賣已差官并兵級管押  
杜義赴遼州宣撫使劉韜軍前交割依軍法施行外訪  
聞尚有未曾出首將佐使臣奏聞事奉聖旨限今來指  
揮到日更與再展十日許令所在州軍出首免罪特與  
支破遞馬驛券疾速赴軍前自效候立功優加推賞如  
今來再限滿日更不首身當議取見姓名重立告賞收  
捉候獲定行軍法仍多出榜文曉諭施行 司諫陳公輔  
上言乞戒大臣究心邊事臣竊聞河東用兵不利陛下

聖慮憂勞臣子之心夙夜不寧然臣竊料之此未必不為宗廟社稷福也伏惟少寬聖心容臣言之蓋有難則懼無難則怠人情之常也朝廷日見河北金兵出界雖未解圍幸其師老必自解散遂至稍緩其事廟堂大臣相謀議者多不急之務或窮究往事或經營私意論經術是非究禮文詳畧至于兩路邊事皆不究心緩急失宜先後倒置內外人情雖知秋冬在近深可為憂然非朝廷用事之臣徒憤嘆終日無如之何也今若不緣用



兵不利往往遂以為無事因仍媮惰至秋冬萬一強敵  
結集諸部空國而來以助河東之師則吾之倉卒無備  
又復如前日矣可不慮哉臣愚伏望陛下因此一失深  
戒大臣凡不急之務一切暫罷專以河北河東兵事為  
先經營畫置多方應辦仍仰各盡所聞勿懷異意并令  
今後臣僚上殿亦須先及邊事陛下留意聽納不厭其  
多或有可行盡付三省樞密院令斟酌施行夫漢之所  
以勝楚以屈羣策而愚者千慮必有一得勿謂羣臣之

言皆無可採即陛下若今如此時日夜圖之則不徒以濟今日之急將來秋冬亦不失備矣臣故曰此未必不為宗廟社稷之福也臣區區憂國之言望陛下不以臣愚弃之豈獨臣之幸哉

三朝北盟會編卷四十七

欽定四庫全書

三朝北盟會編卷四十八

宋 徐夢莘 撰

靖康中帙

起靖康元年六月一日丙申盡十八日癸丑

六月一日丙申朔前降姚平仲立賞捕指揮更不施行  
三日戊戌知河東宣撫使种師道罷以李綱充河北東  
路宣撫副使 遺史曰种師中失利於榆次金人急攻

河東种師道請會山西陝西京畿之兵屯于青滄滑衛  
河陽預為防秋之計朝廷不從遂罷師道宣撫使少宰  
吳敏門下侍郎耿南仲以為中國勢弱敵國方強用兵  
無益宜割三鎮以賂之謝克家孫覲李擢李會王及之  
王時雍劉觀七人結黨專附南仲以堅和議知樞密院  
事李綱以為祖宗之地義不可割棄之徒資敵勢使生  
靈陷于敵國豈為民父母之道哉上念祖宗疆土哀惻  
黎元乃從綱議為再援之計敏南仲請以綱為河東宣

撫使上欲用綱而綱辭以非帥才不任其責御史中丞  
陳過庭侍御史陳公輔皆言李綱儒者不知軍旅將兵  
必敗又言綱忠梗異衆為大臣所陷他日成功亦死敗  
事亦死不宜遣綱使綱出劔則太原失守貽憂近甸禍  
生不測非計之善敏南仲以他將庸繆無踰綱者朝廷  
以樞衡之臣督責諸將則孰不為用是時太原安撫使  
張孝純數遣人以蠟書告急上深念太原困悴而朝議  
咸欲用綱且見忠梗果銳期于立功乃以綱為河東宣

撫使公輔與諫官余應求言綱不當去朝廷上怒皆罷之傳信錄曰种師中歿于軍前師道以病先歸執政間乃有密建議以某為宣撫使代師道初斡里雅布之師還抵中山河間兩鎮兵民以死固守不肯下肅王張邦昌及割地使等躬至城下說諭即以矢石及之乃退沿邊諸郡亦然而种師中進兵逼之金人出境兩境無虞尼堪之師至太原城下太原亦堅壁固守尼堪屯兵圍之姚古進師復隆德府勝軍扼南北關累出兵互有勝

負然不能解太原之圍而師道駐滑州復以老病即罷  
上納建議者之說決意用某宣撫兩路督將士解圍一  
日對睿思殿諭所以欲遣行者某再拜力辭自陳書生  
不知兵危城中不得已為陛下料理兵事實非所長今  
使為大帥恐不勝任且誤國死不足以塞責帝不許即  
命尚書省出勅令面受某奏曰藉臣使不量力為陛下  
行須擇日受勅今拜大將如呼小兒可乎上乃許別日  
受某退即移疾在告入劄子乞致仕力陳所以不可為



大帥且云此必有建議不容臣于朝者章十餘上輒答不允且督令受命於是臺官余應求諫官陳公輔相繼上言某不當去朝廷上皆以為大臣遊說斥去乃無敢言者或謂某曰公知上所以遣行之意乎此非邊事乃欲緣此以去公則都人無辭爾公堅臥不起讒者益得以行其說上且怒將有杜郵之賜奈何某感其言起上命錄裴度傳以賜予入劄具道吳元濟以區區濃蔡之地抗唐室與金人疆弱固不相侔而臣曾不足以望裴

度百分之一以度況臣實為非倫且言諸葛亮出師表親小人遠賢臣此後漢之所以傾頽也夫君子小人於用兵之間若不相及而亮深以為言也誠以敵國外患有可掃除之理而小人在朝蠹害本根浸久難去其患有不可勝言者是以吉甫贊周王以北伐必有孝友之張仲裴度相唐宗以東去必去奸邪之元稹用能成功焜燿國史君子小人之不兩立從古以然臣切觀陛下嗣位之初適遭金人入汴宵旰憂勤勵精圖治思刷前

恥雖帝王勤儉之極無以遠過然邪正尚猶混殽于朝  
翁訛成風殊未退聽謂宜留神照察在于敵國之先朝  
廷既正君子道長則所以扞外患者不難也今取裴度  
論元稹魏簡章疏節其語輒塵上聽上優詔寵答宣撫  
司得兵二萬人而闕馬某白上曰戎事以馬為先今乏  
馬如此無以張軍容天寶末封常清出師幽薊人觀之  
見其軍容不整皆叛去今臣出師安知無窺覘者所繫  
國體非細故也事迫矣請括都城給價償之可得數千

足上以為然令條具聞既而榜于開封府曰宣撫司括  
馬軍事屬搔擾可更不施行其意與前所榜同余竊歎  
息而已期以六月二十二日啟行而數事皆未辦集乞  
量展行期上批曰遷延不行豈非拒命某惶恐入劄子  
辨所以未可行者且曰陛下前以臣為專權今以臣為  
拒命方遣大帥解重圍而以專權拒命之人為之毋乃  
不可乎願併罷樞密院事宣撫使告繳納上封還遣使  
輒召數四余入見上具道所以為人中傷上頗感動乃

以二十五日戒行

五日庚子詔蔡京蔡攸永不放還臣僚言爵祿者朝廷設之以待天下之士崇德報功雖人主不得以好惡私焉况天下哉自古賢者在位能者在職然後百度修庶績凝方夏安姦宄消強敵不敢輕侮吾國百王由之若出一軌自崇寧初蔡京輔政首亂舊章排斥異己汲引同類待以不次朝脫冗散幕翔嚴近常情鮮克自重於是枉道求合汨喪廉恥靡然成風凡所厚善不獨顯榮其

身又及其子孫不獨及其子孫又及其親戚故舊陰相  
依重盤根錯節牢不可破二紀之間門生故吏充牣天  
下然才者少不才者多省事者少生事者多貪殘苛刻  
遠邇告病此猶非京之本事也察其立三衛置四輔疏  
興化之水修臨平之塔又令許敦仁奉請太上皇五日  
一視朝當此之時孰不為朝廷寒心幸其族子有所陳  
告臺臣因之論列其事太上皇雖令納污猶令塹其墳  
山京之僭心終不肯已又加王安石王爵欲自為階梯

衆論喧騰心不自安復封韓琦以塞人言而蔡確何執中鄭居中童貫皆因之為例封王矣本朝之封王者不過國初功臣及后族耳隳國朝之法長姦雄之心京兆悖之情遇事輒發不可一二數也賴太上皇聖明不為京邪說所惑京知狂謀終不得逞於是納附戚里內侍交通宮禁肆所欲為以耗國財以弊民力心欲坐視顛覆以快不遜之忿鄧洵武范致虛等為紹述之言以助京劫持上下而何執中余深林攄薛昂皆其死黨濟其

奸謀成其羽翼使不可制太上皇每下詔書施行善政  
皆為此輩壅遏是以人心日益愁怨國勢日益陵替權  
門日益強盛朝廷日益孤弱趙挺之劉逵張康國鄭居中  
劉正夫雖號與京不同然引用羣小梗閉正路亦率由  
一道蔡卞蔡攸乃其子弟相與違異有若仇敵考其蹤  
跡實皆有同惡相濟至王黼為相奢汰愈甚開邊黷武  
禍及生靈迹其所來亦本由京勢位相軋乃相攻陷遂  
至敵人窺伺生變一旦太上皇播越宗社阽危雖其所



至非一要之造端立本捨京而誰天錫陛下剛健文明  
自嗣服以來元惡大憝以次竄殛忠臣善士悉皆搜揚  
蓋欲恢復祖宗憲度以幸天下傳聞四方靡不呼舞然  
京之降黜屢有指揮而罰不當罪輿論所鬱縱朝廷未  
欲誅于兩觀之下猶當投之海外以示薄責具宗族婚  
姻因京而至顯官者望悉改正上以謝宗廟社稷之靈  
下以慰生民之望無使餘惡復熾殄敗風俗然後將何  
執中余深鄧洵武等第其罪惡各加貶責所有王安石

等王爵亦乞寢罷陛下明目達聰察而揆之大革澆浮  
一陶淳厚則太平之基可立而四方日靖矣願陛下留  
神裁察取進止六月五日奉聖旨京攸永不放還如臣  
僚敢有引薦當正刑章

六日辛丑有流星大如五斗器自東南起明照地衆星  
隨之向西北而墜有聲如雷熒惑犯執法右 資政殿  
學士劉韜除宣撫副使解潛除制置副使代姚古徽猷  
閣待制折彥質除河東宣撫司幹當公事與解潛治兵

隆德府自威勝軍救援太原張灝節制河東陝西軍馬  
應援太原間是役也折彥質為宣撫司幹當公事與解  
潛治兵于隆德府潛辟趙鼎為置司幹當公事是時真  
定在河東最為堅壘朝廷以金人方攻太原防其東軼  
犯朔之地乃以真定府路安撫使劉韜為宣撫副使領  
兵五萬守遼州以扼其後真定府路總管王淵鈐轄李  
質皆從韜辟置先是統制武漢英將京軍三千人救太  
原以兵少遂來真定見韜不與漢英至五臺山見龐僧

正說龐僧正聚集本山僧行往代州欲劫金人之背未  
出五臺山界遇金人戰不勝漢英走入平定軍瑜珈寨  
寨中推搗木下打死漢英雖不得真定之兵然真定武  
勇盡為韜率之以西繇是真定遂虛矣

八日癸卯張孝純除武當軍節度使制曰門下總師以  
順為武克宣捍敵之能行賞無常眡功宜懋疇庸之典  
眷時賢帥廼國名臣允資屏翰之良誕錫絲綸之渥拂  
龜諏日讀命颺廷資政殿學士光祿大夫河東路經畧

按撫使張孝純學粹而行高志剛而識遠恂躬儒雅之度盤薄乎胷中之竒憲憲備文武之才縱橫乎域外之議自專將閩寶廣廟謨閭里輯寧士卒悅服屈敵人之侵軼抵并門而攻圍夙夜勵兵民之心咸奮節誼上下體朝家之念叶贊智謀訖保全湯之強屢挫敵鋒之銳載惟忠蓋良劇歎嘉是用仍撫太鹵之故疆延援武當之重鎮索兜戟纛益位于多儀干戈威揚靡繇于內御亟視秩于亞保兼進侯于舊封衍以爰田陪之貢

賦併推異數昭示至懷於乎光弼之守太原終成殊績  
吉甫之伐獫狁尚倚壯圖往承寵章祗迪猷訓可特授  
檢校少保武當軍節度使進封開國侯加食邑五百戶  
實封二百戶差遣如故 王稟除建武軍節度使制曰

門下奮干戈之衛烈士之所願忠圖疆場之名明主之  
所經武眷予宿將渙以殊恩侍衛親軍馬副都指揮使  
鎮西軍節度使武安縣開國侯食邑五百戶王稟性質  
沉雄智謀深靜便弓劍之習負勁氣于山西貫韜鈴之

書走雄名于塞外久率戎伍夙著戰策比總帥屯往護  
并晉屬金人之背誕窺邊堦以陸梁城之受攻自冬及  
夏協主帥之策飭備則嚴屬兵民之心致命無貳精意  
可動于衆瞻聲威能折于姦鋒欲示勸于茂勲顧何愛  
于異數高牙大纛授于介藩貢食爰田加于止賦於戲  
賞不踰月矧已厚于念功志欲及時尚益堅于許國暢  
我武節勉示顯庸可特授建武軍節度使進封太原郡  
開國侯加食邑五百戶實封二百戶

十五日庚戌勅解潛諸將士 朕以敵兵入境倣擾邊  
陞攻圍太原累時未解卿等帥師援命頗聞將士遇敵  
血戰冒犯鋒鏑奮不顧身非忠義所及安能如此朕聞  
之感歎不忘于中然敵衆方強未即殄滅一方之民久  
困塗毒重惟國家撫養將士固已有年今日國家有急  
非卿等盡命竭力所向無前安能使朕得寬憂顧但戰  
者危事今令卿等挺身冒難以致創殘每一思之痛若  
在己今降賜一千兩金束帶五条戰袍三十領卿可用



激賞中傷用命將士將來第功自節度使以下皆為賞典若更有竒功便加開封儀同三司朕自聞進師寢食俱廢卿等其副朕懷早建勲烈身取富貴澤流子孫日竚捷音更宜加勉

十六日辛亥白時中李邦彥並落職 臣僚上言臣聞宰輔得人則嘉謀日告于上善政日施于下外蕃聞風而畏遁百姓安土而樂業儻或不然而又懷奸誤國則罪不可追臣近論列前太宰白時中李邦彥尸素無恥

悖慢不遜及與王黼梁師成蔡攸相為表裏等事未蒙  
指揮施行况其罪惡更有深于此者臣請言之昨金人  
匪茹提兵入境比至京城聞陛下嗣位感歎畏服已有  
悔過之意宰輔不才倉卒無謀時中則請避地于襄陽  
邦彥則請割三鎮之地謬懦不忠士庶憤怒流放之誅  
其可後乎昔在章聖時契丹舉國入寇是時或請幸蜀  
或請江南惟寇準獨主北伐之議金人畏威求盟而退  
觀此則時中之罪大矣及仁宗時契丹驕蹇輒請闕南

之地是時富弼奉使為陳利害之端而金人辭服觀此則邦彥之罪大矣其謀雖異其罪則同今尚以特進觀文殿大學士優游里第典領宮祠未正典刑士論洵洵臣願陛下特敷睿斷重加黜責以為大臣誤國之戒取進止六月十六日奉聖旨白時中李邦彥並落職中興姓氏錄曰李邦彥宣和七年拜少宰時四方已亂而奢侈愈甚小人滿朝畧無一言諫諍靖康初拜太宰聞金人軍中嗤笑曰宋果無人大金犯京師邦彥勸上為

避敵之計又力主與之講和為便令李鄴鄭望之往使于大金請和虛張敵勢驚嚇朝廷肅王張邦昌往質于大金諸路勤王兵來皆欲力戰邦昌怯懦力沮之李綱出兵救姚平仲為大金所敗邦彥乘勢罷其右丞士民怨憤大學觀上書言其罪陳東引進士數十伏闕上書言邦彥乃社稷之賊也軍民數十萬大呼闕下會邦彥訶殿出右掖門士人慢罵曰汝是上皇時浪子豈堪作相至以瓦石擊之而不可前從者徐行偃蹇畧無護保

之意衛士羅列天街至拔刀以待之邦彥乃覺遂回馬  
衣皂綈藏于密院直抵晚衆人散盡方乘轎令私僕擡  
歸府舍乞罷相數日吳敏上書薦其功遂復為相种師  
道奏請俟大金退必三涉河伏兵一擊使無遺類姚古  
亦請半渡而擊之邦彥力沮其謀罷將帥以堅和議故  
大金得肆其志矣次月陳公輔言其姦邪遂罷為觀文  
殿學士提舉杭州洞霄宮臣僚再言其誤國之罪安置  
四年范宗尹為相薦復舊官薨

十八日癸丑蔡懋落職宮祠分司居住 臣僚上言謹  
按蔡懋天資險薄臨事傾側諂附蔡攸結為死黨攸在  
樞府邀求宰相知懋京可以頻對使懋日論王黼罪惡  
黼雖罷相道君皇帝察攸素無學術不命以相攸尚引  
懋同為樞密以報助已之功當敵擾攘京城圍門時懋  
在本兵之地卒無一言以助計畫陛下當自知也今陛  
下以邊事未寧雖在盛暑日再御殿訪納孜孜不遑寢  
食而懋為大名帥不恤民情不憂邊事日用妓樂飲醺

廣造舞衣戲衫酣醉獲雜殊無體國之意軍民皆不堪  
命欲殺之言喧於道路大臣如是可謂辱國又按懋昔  
以父確事跡妄加增飾誣詆宣仁聖烈皇后垂簾時事  
欺罔道君皇帝乞御製確傳載懋誣詆之語伸其父勞  
中外讀之無不痛泣此懋可誅之罪也陛下政事盡法  
祖宗之舊而宣仁皇后保佑前朝功德甚高為懋詆誣  
言不可讀忠臣義士氣拂其膺願早昭洗陛下尚未暇  
及臣所以甚感也今懋猶帶學士均逸宮祠陛下何以

示天下何以勸忠孝臣伏望睿慈落懋非據之職治其  
莫大之罪授以散官投于嶺嶠永不放還仰慰宣仁在  
天之靈天下幸甚候勅旨六月十六日奉聖旨落職官  
祠又上言奉聖旨蔡懋落職官祠者臣竊見所降臣僚  
章疏若止言懋身為舊輔任當元帥方邊事未寧陛下  
憂勤旰食之時而乃日事飲醕至軍民怨望欲殺之言  
合重行竄斥又况所論誣詆宣仁聖烈皇后欺罔道君  
皇帝二罪之重孰大于此按懋所著父確事節一出私



意妄加增飾自古姦臣愚弄矯誣未有敢如此之甚者  
蓋其天性兇暴輕蔑朝廷故居之不疑中外莫不憤歎  
陛下臨御以來雖一夫之寃有不得伸者必為之昭雪  
而宣仁聖烈皇后為臣下所誣負謗抑者有年矣陛下  
可不為動心乎今懋乃止于落職宮祠豈足以坐詆誣  
欺罔二聖之罪哉伏望睿斷明正懋罪亟行投竄候勅  
奉聖旨蔡懋降充中大夫秘書少監分司南京亳州居  
住中興遺史曰先是蔡懋二月罷尚書左丞以資政

殿大學士尹大名府得宮祠中書舍人安扶繳納詞  
頭論之尼堪復奪所割與夏國天德雲內等地 節要  
曰金人初欲攻遼慮獨力不能勝之遂於海上許燕雲  
以結朝廷既得志復敗盟取之又欲入侵中國亦慮獨  
不能勝遂許割地以結夏人至是既見中國之易又復  
取先所割天德雲內河東八館武州惟金肅河清二軍在  
大河之西不能取之 御寶約束河北之臣不得遣家屬  
尚書省劄子奉御寶批朕托於兆庶之上所賴以共守

祖宗疆土者實惟郡邑之臣比聞河朔河東尚有弗思  
體國惟務便私公檄去官先遣家屬有一于此民何望  
馬朕念今歲之春我實無備故逃職之吏逭其大戮今  
邊計鼎新可以責其固守矣法不可弛恩不可再五申  
三令誅將必行咨爾有衆體予至意 二十五日庚申  
賜御筵餞李綱于瓊林苑 李綱以二十五日戒行前  
期賜燕于紫宸殿又賜筵于瓊林苑所以賜勞甚渥

二十六日辛酉宣撫使李綱犒軍斬樂州都統制熙河

路軍馬焦安節 初焦安節隸姚古帳下威勝軍虛  
傳賊馬且至安節鼓扇衆情勸姚古退師至隆德又  
勸遁去于是兩郡之人皆驚擾潰散而初無賊馬至  
是從姚古還闕網召斬之

三朝北盟會編卷四十八

欽定四庫全書

三朝北盟會編卷四十九

宋 徐夢莘 撰

靖康中帙

起靖康元年六月二十七日壬戌盡七月二十一日乙酉  
二十七日壬戌李綱以宣撫兵發京師 遺史曰綱以宣  
撫兵發京師种師道送之歸而歎曰兵可憂矣 李綱抵  
河陽入劄子論罷起兵等事 傳信錄曰綱入劄子以畿

甸汜水關西都河陽皆形勝之地城壁頽圯當亟修治今雖晚然併力為之尚可及也又因望拜陵寢潛然流涕恭惟祖宗創業守成垂二百年聖聖傳授以至陛下適于艱難之秋敵人內侵中國勢弱此誠陛下嘗瞻思報勵精求治之日願徐考祖宗之法一一推行之進君子退小人無以利口譎言為足信無以小有才未聞君子之大道為足使益固邦本以圖中興上以慰九廟之靈下以為億兆蒼生之所依賴天下幸甚初余陛辭日為上道唐恪聶山之

為人陛下信任之篤且將誤國故於此伸言之上批答有銘  
記于懷之語留河陽十餘日訓練士卒修整器甲之屬進次  
懷州自出師後士卒不得擾民有趕奪人之釵子者立斬之  
以狗拾遺棄物決脊黔配逃捕獲者皆斬以徇故軍律頗肅  
無敢犯者嘗以謂步不勝騎騎不勝車金以鉄騎奔衝非車  
不能制之有張行中者獻車戰制度兩竿雙輪施皮籬運轉  
徑捷每車用甲士二十五人執弓弩鎗牌之屬以輔翼之結  
陣以行鉄騎遇之皆退遁造千餘兩日習之候防秋之兵集



以謀大舉而朝廷降旨詔書所起之兵悉罷減之余上䟽力  
爭其大畧曰臣昨待罪樞府伏蒙陛下委令措置防秋之兵  
臣意以謂中國之軍政不修幾三十年矣闕額不補者過半  
其現存者皆潰散之餘不習戰陳故金人得以窺伺既陷燕  
山長驅中原遂入畿甸來無藩籬之固去無邀擊之威廟堂  
失策使之割三鎮質親王劫取金帛以億萬計驅擄士女屠  
戮良民不可勝數誓書之言所不忍聞此誠社稷之羞陛下  
當膽而思報者今河北之敵雖退而中山河間之地不割敵

馬出沒并邊郡塞柵相連兵不少休太原之圍未解而河東之勢危甚旁近縣鎮皆為敵兵之所占據秋高馬肥敵騎憑陵決須深入以責三鎮之約及金帛之餘數儻非起天下之兵聚天下之力解圍太原防扼河北則必復有今春之警宗社安危殆未可知故臣輒不自揆為陛下措畫詔書以團結諸路防秋之兵大約不過十餘萬人而欲分布河北沿邊雄霸等二十餘郡中山河間真定大名橫海五帥府腹裏十餘州軍沿河一帶控扼地方翊衛王室隄防海道其甚者解圍

太原收復忻代以捍金人夏人連兵入攻不知此中數萬之衆一一皆到果能足用而無敵馬渡河之驚乎臣被命出使去清光之日未幾朝廷已盡改前日之書調發防秋之兵既罷刀弩手又罷土兵又罷四川福建廣東南路將又罷荆湖南北路係將兵不係將兵而京西諸郡又皆特免起發是前日詔書團結之兵罷去大半不知金人聚兵兩路入攻將何以支吾而朝廷何特不留意於此也臣思之以兵為不須起者大槩有五川廣建荆

湖之地遠一也錢糧犒賞之費多二也河北寇退天下已無事三也太原之圍兵馬不多不攻自解圍四也探報五也若以川廣福建荆湖之地遠則詔書之下以四月期天下兵今已七月當時關報三省何不即止今已七月遠方之兵皆以在道始復約回是復蹈今春勤王之師約回之弊也一歲兩起天下之兵中道而兩止之天下謂何臣恐朝廷自此不復能取信四方而將士解體矣國之大事在戎宗社安危所繫且行且止有同兒

戲臣竊痛之若以謂錢糧犒賞多則今春無少捍蔽致令誤國土地寶貨人民皆為所取今惜小費又不為備臣恐後來所取又不止于前日也況元降指揮防秋人兵各令費糧以行則錢糧犒賞之乏似非所患廟堂不深思祖宗大計而惜小費臣竊所不取也若以河北兵退天下無事則邊境日報金人聚兵聲言某月入當取某地強敵臨境非和戰朝夕恐悚懼其復來天下果無事乎賈誼謂厝火積薪之下而坐其上火未燃因謂

之安今日觀之何止于火未燃也殆處于烈焰之旁而  
言笑自若矣若以謂太原之圍兵馬不多不攻自解自  
春徂秋攻守半年曾不能得其實數姚种二帥以十萬  
之師一旦皆潰彼未嘗有所傷衄不知何以知其兵之  
不多以為可以不攻而自解者臣謂非愚則誣至于林  
牙高麗兵牽制之報理或有之終不可恃彼之不來當  
恃我之有備則屯兵聚衆正今日之先務不可忽也今  
河北河東州郡日告危急乞兵者皆以三五萬為言而

半年以來未有一人一騎可以副其求者防秋之兵甫集又皆遣罷不知此何理也若必謂不須動天下之兵而自可無事則臣誠不足以任此則陛下胡不令建議之人代臣坐致康平而重為此擾擾也除范世雄所統湖北兵聞已至襄唐間臣只依奉聖旨令疾速發赴宣撫司外有餘路乞依元降詔旨起發庶不誤國事未報間再具奏曰近降指揮減罷防秋之兵臣所以深惜此事者一則河北防秋闕人恐有疎虞二則一歲之間再

止之無以示四方大信防秋之計臣前奏論之已詳請  
為陛下更論失信之意昔周為犬戎所侵嘗以烽火召  
諸侯恐未必至也舉烽以試之諸侯之兵大集知其試  
已皆怒而歸其後真舉烽火無復至者去冬金人至闕  
始起勤王之師遠方之兵踴躍赴難至中途而以和議  
詔止之皆憤惋而返今以防秋之故又起天下兵良非  
獲已遠方之兵率皆就道又復約回將士卒伍寧不解  
體夫以軍法勒諸路起兵而以寸紙罷之臣恐後時有



所號召無復應者矣終不報

二十八日癸亥姚古責授節度副使廣州安置 御史

中丞陳過庭上言謹按姚古畏懦唯以寶貨鬻于童貫  
濫被恩賞以至於是荷國厚恩宜思所報自太原被圍  
提重兵逗留不進及种師中以忠勇自奮而古違期弗應  
遂至師中失利此古可斬之罪一也金人方圍太原未有  
一騎一卒敢入南北關自師中失利古輒退師威勝士  
庶叩馬懇訴願共守禦古乃夜遁去致使威勝之民扶

老携幼斃于道路哭泣之聲振于山谷此古可斬之罪  
二也古既退師其部將又妄言於衆曰國家已割太原  
與金人我輩所以南歸於是役夫般運糧草器甲及民  
蚕在箔者委棄而去此古可斬之罪三也興師之初有  
效用十五人直入隆德縛偽守倅以獻不血刃而得一  
郡古掩其功狀不以實聞致此十五人者止於賜帛而  
已士氣沮傷抱戈不戰此古可斬之罪四也當偽官之  
守隆德存卹其民人保護其婦女敵兵敢犯立斬以徇

又閉敵兵於他所不許妄出請於尼堪遣還其兵自言  
先世乃汝穎間人深有效順之意一旦縛至軍中古若  
能如韓信之師左車李愬之釋李祐太原之圍自此可  
解乃貪冒功賞獻囚于朝用心不忠安能成事此古可  
斬之罪五也人有於上黨道中見大刀巨斧凡數十輩  
擁騎而載婦人者云是將官寵妾軍中婦人不可勝數  
人無關心士氣不振此古可斬之罪六也古欲退師無  
以發端忽有統制官焦安節厲聲而前曰敵騎迫近何

為尚留于此古既不能斬安節以慰衆心輒從其言領  
衆宵遁實古之謀假手于安節耳此古之可斬者七也  
貼黃訪聞姚古隨行使臣兵級尚有數百人見在城外  
伏乞聖慈指揮先將使臣與兵級放散或拘收他役然  
後施行庶不生生事奉聖旨姚古責授節度副使廣州安  
置 彗出紫薇垣 金人西路尼堪烏舍伊都東路幹  
里雅布達蘭棟摩會于山後草地避暑議事 節要曰尼  
堪烏舍伊都三大將棄太原北去往返千有餘里而朝

廷援兵霧合雲集不能解太原之圍可見失計之甚矣  
七月一日乙丑朔車駕詣龍德宮

十一日乙亥蔡京移儋州安置 右正言程瑀上言臣  
近嘗具劄子論蔡京罪大責輕宜竄海外尋因奏事每  
有敷陳仰蒙陛下面賜允可伏候累日未蒙施行臣竊  
疑之然公論未厭民德未孚京者旦暮之人使遂溘然  
明罰不行徒有後時之悔臣安敢避再三之瀆哉按京  
奸心譎計世無可比假紹述之名行脅持之術擯逐正

士援引僉人交結閹宦密為梯媒首登宰輔尋踐公師  
二十年間逐而復用致仕而復起愚弄朝廷妄作威福  
凡所興建歲月以仍藉以固寵無非蠹國害民京名為  
遵用熙豐之典乃實肆為紛更未有一事合熙豐者敢  
為欺誕欺罔上下道凶焰盛天下之人不敢議而心敢  
非卒致政令紛錯風俗凋靡國用匱乏生靈貧困賄賂  
公行盜賊竊發按其事跡罪在可誅至于鑄鼎列名位  
居九五臨平之山托名祀聖私第引河潛通宮掖引援

闕字公賈妃嬪閨門穢污醜不可言屬者金人內侮事始于童貫而成于王黼與京之子攸然致邊備廢弛本實由京金人入塞盡室東去門生故吏締親密黨其徒如雲蓋不知有陛下不復知有宗社非背叛而何跡其奸惡正名定罪死有餘責陛下既遵祖宗故事不欲戮之而置之曲江名為嶺表實與內地無異天下之怨京入于骨髓陛下灼知京之姦惡悖逆乃不能投畀海外實無以慰塞人望憤懣之氣何由解釋伏望陛下奮乾剛

勵威斷早賜施行其子孫如攸罪惡盈溢臣見別具論  
奏請正刑典偉尚帝姬隳法度亦合離判不當尚聯禁  
戚其餘並乞褫奪官爵毋使尚廩給縣官養贍賊種天  
下幸甚取進止奉聖旨移儋州下開封府差人押解前  
去 蔡攸移雷州安置 右正言程瑀上言臣聞亂在  
外為姦在內為軌姦御以德軌御以刑古之制也刑當  
其罪則刑一人而四海服焉此息亂弭姦之道也蔡攸  
之罪四海之人皆以為可殺陛下未能明罰飭法公議



鬱結按攸豺狼種類固不可以人理責考其挾媚道以  
怙權操譎計以固寵竊弄威柄至于位師傅之尊躬俳  
優之賤侮慢君上污衊宮庭則厥父或未至是盖死有  
餘責矣又况燕山之役攸與童貫同為宣撫喪敗師徒  
盖以萬計卒不能取燕山乃開闕以招金人始厚與歲  
賂易其空城招敵納侮自此其始及金人為南犯之計  
首議於夏初決策於秋末攸任樞府邊吏來告不以上  
聞及其犯塞不復計守禦之事闔家南遊名為扈從上

皇寶皆叛也上皇南歸非獨思企陛下本於天性其深見遠識正應如此攸蓋弄臣陛下上皇豈復與之論議乃敢肆為誣罔謂勸上皇南歸蓋欺罔君上愚弄朝廷雖已敗猶復爾也罪惡彰著海宇憤疾言章交上而名為逐之廣南乃實處之善地修其政刑今日正不可緩伏望陛下發明斷投之海島不使汚我海內實快天下之望取進止七月十日奉聖旨移雷州下開封府差人管解前去

十三日丁丑童貫移吉陽軍安置臣僚上言臣近具奏  
狀論童貫罪惡法當戮誅今月九日因職事上殿再請  
奏陳退謂遂有處分今復未聞臣伏見童貫罪盈惡稔  
訖藏甲養士跋扈難制反刑逆節彰彰著見已合誅夷  
而致敵召亂幾覆宗社何可久這天誅大違人願伏望  
睿明早賜指揮檢臣前奏及臣僚累次章疏早賜施行  
所有假子若孫亦乞處分庶幾威令果行姦惡知懼候  
勅旨七月十三日奉聖旨童貫罪大責輕可移吉陽軍

二十一日乙酉蔡京至潭州以患身故蔡京在德安府被南遷之命七月甲申到潭州據隨行幹當人魏覲狀蔡京鄂州扶疾前來潭州沿路大暑愈覺羸困昏卧不省粥食不進乞差醫職前來看治州差醫助教譚從義易緩看醫是日管押官修武郎監德安府稅趙康轉申蔡京於此日為患身故州差保義郎城東巡檢王從禮迪功郎長沙縣丞權縣事董陟前去審實得在崇教寺因患身故州司以京于崇教寺拘殯 幼老春秋曰蔡

京字元長興化軍人也熙寧三年登進士第少事王安石喜之章惇為相京與弟卞皆譖事之孟后被廢京草詔無一言之諫又欲滅劉摯等家族侍御史常安民言其奸邪譖逐之紹聖二年卞為尚書右丞四年林希同樞密院事故京怨惇之未薦已也遂與惇絕為翰林院學士承旨交納內侍郝隨劉瑗外戚向宗良等故勢益牢元符末諫官陳瓘以四章力彈之殿中侍御史陳師錫兩章言之以端明殿學士知永興軍瓘再言其奸儉

有滔天之罪偃蹇無人臣之禮遂落職提舉杭州洞霄宮建中靖國初召知開封府惟曲奉權倖堂吏段處約等私賣恩澤京不敢推治為侍御史孫升兩章彈之崇寧初遷中大夫尚書右丞俄除右僕射三年遷左僕射深結宦官探上所欲務迎合之善書大字宦官軒亭及功德院額名多京親書姑息堂吏出知州軍變壞祖宗法度不用天下忠正之士自司馬光張商英蘇軾劉安世而下皆指為元祐奸黨禁錮其家汲引奸佞之士皆

登要路廣營產業以收復湟中加左銀青光祿大夫四年以收復鄯廓等四州加司空五年以宮祠罷大觀初復拜左僕射以康居夜郎之屬納土加太尉二年拜太師立阻御筆之限以壞封駁之法務興事功窮極奢侈以蠹國之財賦屢改鹽法以困民力陰為蠹國害民之政妖人術士勸之曰興化公之鄉里也若決水貫之則旺氣愈壯臨平公之父墳也正占龍勢但未有兩角若立兩塔龍角成矣京盡用其言詐言欲利民田遂決其

水又言欲祝聖壽遂建其塔專貢聲色起土木運花石以媚惑人主之心而威福大權盡歸于京矣三年彗星見御史中丞張克公二十一章言其奸邪陳朝老上言書其罪十四吳執中又言其罪乃罷為中太乙使封楚國公臺諫多彈之四年詔京權重位高人屢告變全不引避公議不容降為太子太保以楚國公致仕令毀臨平之塔後為宦官提舉不已政和三年復詔京拜太師領三省事蔡京陰為壞國之計與蔡崇逆謀為陳瓘之




子正彙來告京怒送正彙沙門島編管瓘亦責令通判  
居住諸州門向帝都者謂之朝天門也京改為朝京門  
太學三舍法以貢士退歸者京改為退送皆欲陰合識  
兆張懷素吳儲等謀反為湯東野范寥所告勘得其實  
詞連京開封尹林攄御史中丞余深力為掩覆之京皆  
驟遷二人為兩府姬妾慕容等皆封國夫人門吏若王  
瑜李奎魏伯初張亮等十人皆為觀察而橫行賜金帶  
者數百人名園甲第亞于宮禁諸子皆學士金紫烜赫

子偉尚茂德帝姬拜駙馬都尉自古執政之盛莫與為  
比馮浩以為不誅之必亂天下京怒譖之送浩循州編  
管言路遂絕 中興姓氏姦邪錄曰蔡京自政和二年  
後召拜太師令三省事陰為壞國之計天下大權一歸  
于已日請上游宴以酒色困之宣和初內侍馮浩力言  
京必亂天下宜速誅之京怒譖于上編管浩循州至蔡  
州使人殺之自後言路絕矣有識之士比之王莽方臘  
反于浙四方已亂王黼言于上子攸亦屢言京之短乃

勒京致仕四年五年河北京東羣盜蜂起各十餘萬民  
被其害者數千里皆京所致也七年復起京領三省俄  
以目疾罷大金入侵京勸徽宗幸江西京舉族皆行太  
學生陳東上書言京為六賊之魁靖康初臣寮力言其  
罪責授中奉大夫秘書少監分司南京致仕其子修姪  
仍孫衡述微衿皆落職押歸本貫臣寮又言京罪責授  
崇信軍節度副使德安府安置後又言其罪移衡州安  
置至潭州病卒于東明寺年八十天下士民以不誅之

為恨



三朝北盟會編卷四十九

欽定四庫全書

史部

三朝北盟會編卷

五十四至五十五

詳校官庶吉士臣何道沖

編修臣裴謙履勛

總校官檢討臣何思鈞

校對官中書臣楊世綸

謄錄監生臣葉

欽定四庫全書

三朝北盟會編卷五十

宋 徐夢莘 撰

靖康中帙

起靖康元年七月二十日乙酉盡二十九日癸巳

秀水間居錄曰蔡京四入相宗寧九年拜相四年罷大觀  
元年復入五年又罷政和元年復入宣和初又罷六年冬  
王黼罷相白時中李邦彥並拜太少宰未幾京東盜起京

黨閥然以謂宰相望輕乃詔京復總三省許私第治事三  
五日一造朝時京已八十目盲不能書足蹇不能拜跪矣  
其子條用事凡判筆皆條為之仍代京禁中奏事於是肆  
為姦利賞罰無章黜陟紛紜條外兄韓耜者驟用為戶部  
侍郎密與謀議貶逐朝士殆無虛日條每造朝侍從以下  
皆迎揖附耳與語堂吏抱文案數十人從之遣使四出誅  
求探訪喜者令荐之不喜令劾之中外縉紳無不側目先  
是王黼作應奉司總四方貢獻之物以市權寵於是效之



請置宣和庫庫中置式貢司司分諸庫如泉貨幣餘服御玉  
食器貢等皆其名也上自金玉下及蔬茹無不籠取元豐大  
觀庫及榷貨務見在錢物皆拘撥收樁專事供進次年四月  
條惡日著二相不能舉職條兄攸發其奸狀京罷條亦被譴  
是年冬金兵至闕得非將亂之兆耶蔡京久在相位植黨擅  
權無敢言其罪者惟大觀中再罷政後中丞張克公一疏及  
內翰林張閣一制粗能數其過惡天下傳誦張克公疏曰臣  
先嘗論奏前宰相蔡京罪惡顯著宜加嚴責上答天戒下慰

人心未嘗睿旨施行苟依阿不言非特負陛下之責天下之人皆以責之矣義當竭力不敢但已京頃居相位擅作威福權傾中外濫錫予以蠹國用輕爵祿以市私恩謂財利為有餘皆出誕慢務誇大以興事肆為騷擾援引小人以為朋黨假借姻婭布滿要途以至交通豪民廣興產業役天子將作營葺居第用縣官人船運載花石曾無尊重庶民之心惟事豐已營私之計若是之類其事非一累有臣僚論列臣更不敢具陳若乃名為祝聖壽而修塔以壯臨平之山勢托

言灌民田而決水以符興化之識語致妖僞之告變而  
繆為心疾受孟翊之訛言而與之官爵趙真欲輔之妖  
術張大成竊議其姦意駭動遠邇聞者寒心此皆足以  
鼓惑天下而為害之大者稽之古人有一于此必加嚴  
刑而京兼有之乃獨泰然忽視朝廷無復畏懼人臣強  
盛莫甚于茲去歲東南諸路皆罹旱暵之災者乃其應  
也聖恩寬貸為之保全人心不平而忿嫉之氣充塞海  
內星文變異豈無意耶盖京之罪戾積稔滋久上賴聖

德昭格皇天眷祐為宗社之盛福幸天下之生靈於是  
星文再昭示其意既嘗罷京相消弭于前則正京罪不誠  
有待于今日耶雖天之垂象不當其事應而常無所不  
戒然京之罪未正乃事之最可戒者也始者京再罷相  
士民稱慶以謂京去朝廷必矣既寵以宮祠又許其致  
仕賜以蘓州南園尚無去意然以哲廟實錄未畢猶可  
為說今書已成而去計杳然是終不可去也非天有以  
警悟陛下則人力何能為哉臣聞之書曰天視自我民

視天聽自我民聽又曰天討有罪五刑五用哉蓋天之  
聽因民而已君之用刑視天而已臣願陛下順民心以  
奉天體天道以用刑暴京罪以釋天下之疑以為人臣  
之戒則和氣集而灾沴消矣干冒天威罪當萬死伏望  
聖慈深察愚衷特賜聽納早降睿旨 張閣行責官詞

曰政事所寄尤嚴誤國之誅人臣之姦莫重欺君之罪  
我有常憲揚于大庭太師致仕上柱國楚國公食邑一  
萬二千六百戶食實封四千四百戶蔡京頃以時才久

膺柄任兩冠台衡之峻三登公衮之崇庶圖爾庸以弼  
予治而總秉衆務出入八年事寢紊于復來謀悉違于  
初議擅作威福妄興事功輕爵祿以市私恩濫錫予以  
蠹邦用借助姻戚密布要途援引凶邪合成死黨以至  
假利民以決興化之水托祝聖而飾平臨之山豈曰懷  
忠待將邀福屢有告陳之迹每連狂悖之嫌雖僅上于  
印章猶久留于里第偃蹇弗避傲睨固悛致帝意之未  
孚垂星文而申譴言章繼上公議靡容顧欲用恩難以

屈法其褫師臣之秩俾叅宮保之官姑慰羣情尚為寬  
典於戲上天垂象明罰所以弭灾人道惡盈省躬所以  
引咎往欽善貸無重後愆可特援太子太保致仕依前  
楚國公勲封食邑實封如故在外任便居住仍放謝辭  
陳朝老書曰臣竊觀陛下即政之初布告治朝爰立  
台輔當時羣臣在列聳聽以為所用必竒才也白麻既  
出天下失望夫蔡京姦雄悍戾詭詐不情徒以高才大  
器自處務以鎮壓天下以謂自古人臣惟一切因循苟

簡以為治無敢橫身為國建議立志者於是出而銳然更張以謂天下後世無以復加陛下傾心俯納所用之人惟京為聽所行之事惟京為從故蔡京得以恣其姦佞玩弄無所畏忌直欲敗壞而後已觀其行法出令狗名失實無以異于兒曹稚子終日嬉戲以塵為飯以木為戲何與于饑飽哉且兒曹之戲已則棄之無有後灾以蔡京之所為求其所欲其為害豈特一方與當年蓋將徧四方之廣覃萬世之遠而未艾也厥今天下何如



哉官爵冗而非材雜進財用竭而妄費無已恩澤濫而  
僥倖成風科配苛而農民重困學校紛更而士失所業  
諛佞成俗而上罔聞知恩寵擅分而人多侮法錢與物  
俱重而無術以平之其他害國蠹民誤上罔君未有以  
指數推其弊之所生良由陛下任非其人所以致令縉  
紳士大夫自一命以上皆出其門人無所守各懷私恩  
而不知國家之公議幾成風俗且爵祿名位天下公議  
權臣盜之以植私黨最為有國有家者之大患况蔡京

尤深結陛下之左右近習之人故此曹為之隱蔽是以  
公肆誕謾無敢誰何陛下漸成孤立可為寒心幸其解  
去機務退處祠宮天下之人鼓舞拊蹈有若更生今既  
已謝事尚猶安處上都門闌如市交結內貴其意猶欲  
覬他日之復用也平時出入門下之小人恐其去國失  
所倚恃旁為之助陛下何不察歟願陛下奮乾剛之斷  
勿貳勿疑置之遠方以禦魑魅庶以杜絕其望方快輿  
議臣嘗觀其所為之事合天下之人舉以為非公論未

失劫于勢利導諛成俗無一人敢為陛下言者前者之  
伏蒲戴豸皆伏下風各懷芻豆之愛上下相蒙未以為  
非臣觀考蔡京之所為合而言之則其事止于十有四  
曰瀆上帝曰罔君父曰結奧援曰輕爵祿曰廣費用曰  
變法度曰妄制作曰喜導諛曰鉗臺諫曰熾親黨曰長  
奔競曰崇釋老曰窮土木曰矜遠畧散而言之其事數  
十萬言豈毫楮所能載臣久困羈旅不能具紙墨陛下  
不以臣不肖願詔有司給筆札使臣得盡胸中之所言

寫天下是非之實以告陛下臣死之日猶生之年草茅無知輒議國家大事罪合誅夷干犯天威臣無任瞻天仰聖激切屏營之至 右正言崔鷗劄子臣謹按賊臣蔡京陰蓄異謀潛窺神器故竊爵賞買天下小人以為朋黨相與遮蔽人主耳目卒致敵國侵凌直至幾甸宗廟震動社稷蕩搖上皇南巡肅王北質百姓屠滅天下之賊其罪有大于京者乎此誠祖宗神靈之所切齒也陛下安得而赦之伏望特賜睿斷斬此姦臣為萬世亂

臣賊子之戒取進止 又劄子臣謹按賊臣蔡京以奸  
邪之術誑耀人主大類王莽而朋黨之衆則又萬于莽  
莽之奸也制井田更錢幣說六筦造明堂起辟雍建靈  
臺頒時令築學舍萬區以誑耀其君於是卒攘其國而  
有之而京賊亦用此術其意安在然莽之腹心不過王  
舜劉歆等數人豈如京賊收天下之士以為腹心乎遂  
至盜賊蜂起外侮日逼雖宗廟神靈為之震駭然則京  
賊之罪宗廟神靈之所不赦陛下安得而赦之伏望聖

心獨斷戮此巨奸以為世戒取進止

二十六日庚寅詔解圍太原詔曰朕惟金人攻圍太原百五十餘日其勢危蹙惟兵與食最為急務而朝廷於此二者措置殊未有方每於警奏不過督責諸將俾令進師既不益兵又無見糧安能使之必戰既戰又安能使之必克進者屢衄其弊盖出于此朕每一念疾首痛心寢不能安食不知味今聞強敵築壘臨城控扼要害援師不可進糧道不得通勢益危迫卿等宜究心悉力

廣加詢謀益兵置糧不吝爵賞以勸用命明其政刑以威不恪須管太原解圍若稍有誤事不惟卿等負朕倚注之意朕于負荷之重亦豈委法以苟私卿等哉

二十七日辛卯解潛自威勝軍進兵屯于南關初諸將議進兵劉韜以河東宣撫副使至隆德府張俊苗傅皆隸麾下與諸將期七月皆進王淵與韜出平定軍遼州路解潛折彥質出威勝軍路張灝折可求出汾州路尼堪時在太原聞援兵至乃多積糧于南關佯若聞潛至而

怯懼者匿強壯兵馬使輕兵守之戒之曰解潛必自威勝軍先趨南關俟其至則偽遁潛遣人探止有輕兵乃以兵趨之金人皆偽遁潛以為真遁漸遣人運其糧食金人猶未動已而潛悉遣士卒車馬運糧已裝載就道而金人之兵衝突而至官軍不敢棄糧而潰死者相枕藉自此潛不能軍矣 張灝及金人戰于文水縣敗績 張灝者孝純之子也朝廷以為河東察訪使招河東義勇禁軍五萬由遼州以夾援太原灝命統制張思政為



前鋒遂同折可求到文水縣上賢村馬村下寨金人每  
日出沒遇官軍則偽遁未嘗有勝敗而思政以為不足  
慮遂不設備金人忽取別徑至思政失措官軍遂大敗  
初朝廷命可求節制麟府路軍馬往救太原也知麟州  
楊宗閔告可求曰朝廷命公解圍未審由何路以入若  
路出汾陽以步兵當突騎未見其可願節建上將之  
旗鼓行而聲言救晉假我精騎二萬攻其必救之所則  
太原之圍必自解矣可求善其言而不能士卒至于敗

僅以身免可求以便宜陞宗閔為前軍統制軍馬河東路兵馬鈐轄 傳信錄曰七月二十七日諸路進兵平定軍遼州兩路劉韜王淵主之威勝軍路解潛折彥質主之汾州路張灝折可求主之而宣撫副使察訪使勾當公事皆承受御前處分事得專達進退自如宣撫司雖有節制之名特文具耳余奏上以節制不專恐誤國事雖降指揮約束而承受專達自若也至期出師解潛與賊相遇於南關轉戰四日殺傷相當金人增兵潛軍

力不能勝而潰平定遼汾之師皆逗留不進其後張灝  
又違節制用統制官張思政復文水縣已而復為賊所  
奪余極為上論節制不專之弊又分路進兵敵以全力  
制吾孤軍不若合大軍由一路進會范世雄以湖南兵  
至即薦宣撫判官方欲會合親率師以討敵而朝廷之  
議變矣 勅御史中丞張徵追童貫行刑臣僚上言臣  
聞事有其失甚微其貽患有丘山之重而不可勝救者  
廢置與誅賞是也請以古事驗之昔漢既誅董卓不及

赦涼州部曲李傕郭汜知不免矣激其下以叛遂貽漢  
室之禍此當赦而不赦之失也唐德宗有涇師之變倉  
卒出狩或勸取朱泚殺之否則相逼為亂將大德宗不  
能用涇師得朱泚果稱僭逆遂陷京師賴有良將相與  
戮力僅能克復此當誅不誅之失也臣切觀童貫以閹  
臣僕隸之微盜有兵權幾二十年其壞祖宗軍政關兩  
河邊患結新造之金人棄契丹之舊好禍及華夏至于  
今不止其過惡誤國在蔡京父子王黼之上然其誅斥

獨輕于二人公論固已鬱矣臣為陛下言其大者以消  
未萌之禍童貫久持內外兵柄陝右諸路道勁兵號曰  
勝捷陰常蓄養為牙兵以市私恩其督戰也不使之臨  
行陣特以自衛而已戰而勝則歸功厚賞不勝則擁之  
以適其賞功之猥濫至數千人皆為將校驕縱飽滿無  
復鬪志其實有戰多者皆抑而不賞使西北戰士歸怨  
朝廷者皆貫縱之使至此也其隨上皇之南狩也貫劫  
之東下日用券直或旬時犒賜至純用金銀以給之過

為優厚冀得其死力朝論洶洶至今以為疑也臣又觀近日張思政領勝捷餘卒敗于河東疑潰而東歸宣撫副使李彌大執思政而戮之復遣敗亡餘卒赴真定為援將卒疑懼挾其渠首以叛淄青至今震動貽患一方論者恨其遣潰師之遽而誅思政之早也則漢不赦涼州部曲事之大小雖異其失則同矣臣所謂其失甚微而禍有丘山之重者也雖然此已往之失不可復追未然而事尚可圖也臣聞諸道路山東叛卒文其旗曰負

寬勝捷意欲自沂密入寇淮浙萬一聞貫尚在數懷畜  
養之恩一旦烏合豈不大為東南之患此臣所以夙夜  
過計不能無涇師得朱泚之憂也陛下豈得不過為之  
慮哉况貫自用師持權以來毒流華夏以無事無罪之  
民驅之死地所殺傷者不啻數十萬衆緣貫而破產流  
離者延及四方之民皆陛下之赤子也今以誅一貫之  
身曾不足少謝穹蒼之怒兆庶之怨陛下尚疑而不忍  
者此微臣之所不曉也伏望陛下遣一介之使即貶所

正典刑聲其罪惡以謝天下無辜之民以絕羣小懷怨之望又上言臣竊以謂祖宗垂憲于治安無事之時殺大臣焉當在所戒後世有亂天下危社稷而不殺之非祖宗之志也况如貫者閹腐刑餘在祖宗時止堪掃除之役豈真所為大臣者哉貫握兵柄幾三十年大奸大惡不可縷數臣獨論其可殺而不可赦者壞太祖皇帝之兵制敗真宗仁宗皇帝之信誓通萬餘里之強鄰殘百餘年之與國蕭后欲歸却其表而不受遼主潛遁指



其蹤而使擒契丹舊臣痛入骨髓假手女真俾之報怨  
旁結西夏共為敵讐金騎欲入貫猶趣住太原敵破忻  
代即捨太原以歸具舟楫載所親兵之家屬佩陝西河  
北河東路宣撫使印浮汴渡江淮而去於是時何有陛  
下奈何卒赦之又上言臣謹按童貫以奴隸之資荷不  
世之遇浸緣恩寵包藏禍心近者臣僚論其罪惡備載  
章疏以其養兵于家儲甲于庫有潛謀不軌之兆陛下  
寬容姑投海裔今者竊聞有司檢校其家器用復有校

椅以青龍首金銀絲背為飾者士論傳駭以謂不軌蹤跡暴白無甚于此臣愚聞之史氏為國者見惡如農夫之務去草焉芟夷蘊崇之絕其本根勿使能植則善者信矣貫之誤國召兵幾危社稷兩觀之誅已後天下之望今暴其罪惡復出其不軌之器苟復置之何以為巨奸元惡之戒奉聖旨童貫罪十首薦朱勔起花石引趙良嗣滅契丹修延福宮等朕在東宮屢為搖動冊立之時有異語不俟勅命擅去東南差留守不受命東京解

圍聞之而去家中有非法之物私養死士前項罪不容  
誅差監察御史張澂將帶開封府公人前去追童隨所  
至州軍行刑訖函首赴闕當議賫送宣撫司軍前一行  
人漏泄者依軍法其子孫已降指揮送吉陽軍編管見  
隨童貫子孫仰張澂交割與所在州軍選差官多差兵  
級管押前去如在別州軍即移文監司依此施行

二十九日癸巳右武大夫温州觀察使提舉河北西路  
保甲兼權提點刑獄權真定府李遯除青州觀察使知

真定府

是月空日遣使與金人元帥皇子二書 宣和錄曰七月空日大宋皇帝致書大金國相元帥比因專使嘗已布書具載悃誠想加通亮但以三鎮之民懷土顧戀以死堅守雖令不從遂至宿師引日已久重兵民各為其主困于暴露深可憫傷是用欲三鎮稅租組充歲幣既不失通和之議抑亦為長久之圖諒惟仁明必能矜察已遣使大金皇帝及皇子郎君今再命單車復陳本末

願加聰亮有少禮物具如別幅秋暑尚熾更希保護白  
七月空日大宋皇帝致書大金國皇子郎君比常布  
問具致悃誠近因使介之旋尤詳修好之意但以三鎮  
之民懷土顧戀雖令不從以致宿師引日已久重兵民  
各為其主困于暴露深可憫傷是用願以三鎮稅租組  
充歲幣方昭大信諒不受于間言將究遠圖豈自生于  
細故俾長利于兩國在仁人之立談想為英聰必能體  
亮已遣使大金國相元帥今再命單車復陳本末願加

聰察有少禮物具如別幅秋暑尚熾更希保護白 尼  
堪大起雲中路民兵之太原 王安中臨江軍安置臣  
僚上言謹按王安中昨自尚書左丞建節知燕山府委  
任之寄重矣借令無才可辦邊事至如敵勢强弱與沿  
邊兵食之闕饋運艱難民戶殘弊衆所共知者自合條  
具實狀逐項奏聞使朝廷灼見利害審定取捨早為備  
禦之策而安中畏避童貫專務蒙蔽終不端言其事數  
奏祥瑞誣罔諂諛以固寵祿養成邊患一旦敵騎長驅

燕薊覆沒深入畿甸社稷幾危推原本因其罪與蔡攸等耳今臣僚論列以謂行法未盡乞斥諸遠方少為誤國者之戒雖責授散官復處漠東近地恐公論不以為允矧以太原被圍師屯未解強隣壓境朔部戒嚴若不恃賞罰之公厭服物論何以正其蒙蔽欺君之罪奉聖旨移臨江軍安置

三朝北盟會編卷五十



欽定四庫全書

三朝北盟會編卷五十一

宋 徐夢莘 撰

靖康中帙

起靖康元年八月三日乙未盡二十日癸丑

八月三日乙未太宰徐處仁少宰吳敏並罷以御史中丞李回言章也 徐處仁觀文殿大學士中太乙宮使制曰門下圖治有要在人主所寶惟賢充位無聞則朝

廷焉用彼相眷予上宰久預政機謀猷闕著于事功體  
貌務全于終始誕敷明命播告多方正議大夫太宰兼  
門下侍郎徐處仁器質淳龐才能敏邵蚤年治郡素高  
黃霸之風晚歲裕民竊陋桑羊之政比疇雅望列處宰  
司允藉老成庶殫衷悃矧國步艱難之日乃廟堂叶贊  
之時不知黽勉以赴功相與逡巡而固寵乏可否之相  
濟唯同異之是聞邊患未寧方寸陰之可惜機會一失  
恐駟馬之難追道路流言士夫興歎覽封章之引咎具

公論之騰喧俾解鈞衡進升祕殿即祠宮之優逸昭命  
數之休隆併衍爰田申陪貢賦於戲任舊人以共政初  
朕心豈有意於遐遺詢黃髮則罔愆惟爾躬尚無忘于  
辰告往祇予訓其體眷懷可觀文殿大學士中太一宮  
使依前官加食邑七百戶 吳敏觀文殿大學士醴泉  
觀使制曰門下茲以朕嗣承丕緒統御萬邦當論相之  
初賴股肱之允協至臨事之際乃矛盾之是聞念久處  
于廟堂務曲全以體貌我有明命颺于大廷通議大夫

少宰兼中書侍郎吳敏性識靜深器資闊遠高文足以  
華國鯁論足以濟時頃上皇臨朝遍歷從臣之選逮眇  
躬踐祚首登揆路之崇藉爾孤忠輔予大業方邊陲之  
未靖顧宗社之可虞有厝火積薪之危有垂髮九淵之  
懼爾乃玩歲而愒月莫知排難而解紛持首鼠之兩端  
乏鉛刀之一割稽違使指潛失事機致公議之騰誼亟  
剡章而瀝懇宜解鼎司之重任就升秘殿之隆名均逸  
真祠併昭異數於戲閔勞以事尚素蘊之可觀益勵乃

忠想嘉猷之未替祇服休寵勿怠壯圖可觀文殿大學  
士醴泉使依前加食邑七百戶 唐恪除少宰制曰門  
下周室任賢詩雅羨甫申之維翰漢朝論相史官稱丙  
魏之有聲皆垂希世之名用起中興之治朕念彊隣未  
靖輔臣罔功冀得真才付以樞柄繫生靈之休戚守社  
稷之安危咨爾在廷明聽予告正奉大夫守中書侍郎  
建康郡開國公器識闔遠德履端良學足以通治亂之  
原力足以任股肱之託召從外服知畧輻輳於朕前敷

歷正途風采想聞于天下渾渾忠義之氣憲憲文武之  
資為時顯人宜膺大任亟升華于右揆仍兼秩于西臺  
申衍爰田並陪真食於戲艱難多事莫甚此時謀議盈  
廷當求善策念民力之已困恐國勢之易搖修政刑以  
固本根謹闕防以消外侮用殫財而易賦毋黷武以貪  
功顧後患之可虞惟前車之是戒予違汝弼汝言予從  
無忘厥功庶永終譽可特授少宰兼中書侍郎依前官  
加食邑七百戶 徐處仁知東平府吳敏知揚州臣僚

上言臣等歷考自古中興之君商高宗則得傳說周宣  
王則得仲甫漢宣帝則得魏相協心相與圖治故能伐  
鬼方攘獫狁單于慕義稽首稱藩載之經史不磨唐肅  
宗用裴冕苗晉卿之徒相業庸謬肅宗之治因以不振  
稽古之士於此惜之伏惟陛下勤儉之德本於生知緝  
熙之學期於日益蓋與商高宗周宣王一無以異漢唐  
而下皆不足數然自即位已來歷今三時邊陲未寧黎  
元騷動興治補弊之效未有可觀者殆以宰相非其人

乎謹按太宰徐處仁初以蔡京薦進自縣令不三年備位政府縉紳駭其速化而不聞見有善譽也自金人退師陛下採其治郡之能擢為首相蓋將與圖回天下之務取生民愁歎之弊盡革之而器局凡陋不知大體智識滯暗不通時變曾不能宅百揆熙庶績以副具瞻之望太宰之職可居乎謹按少宰吳敏初以蔡京欲聯親議遂以羣雍私試高等入仕因與京結為死黨在上皇朝縉紳目之謂在劉丙林攄之右上皇內禪睿志先定



父子授受夫復何疑而敏因蔡攸刺得密旨乃貪天功  
以為己力處仁符竊相位使其效力自贖猶或可容而  
以佞濟姦私植黨與凡其設施悉效蔡京意在專權固  
寵雖處仁暗猶能識之二人因以不和而天下之事遂  
致壞缺每出一令行一政命一官除一吏不恤社稷之  
安危生民之利病惟務已言之勝遷延淹時者有之朝  
令夕改者有之遂使天下之民自春涉秋日望朝廷之  
惠澤而殊未有以慰其心也方今強敵憑凌重兵壓境

河東之役師老糧匱天下之憂日甚一日而和議之使未遣擾民之事益繁怨讟並興上天見異穀未及穫飛蝗蔽空而處仁與敏傲然自肆畧不引避意在歸過人主殊失愛君之義矧以小忿交爭黜座之前大臣之體得如是乎臣等採之僉言稽之舊典處仁與敏誤國負恩罪在不赦伏念祖宗創業艱難之重上皇罪已傳位之心下恤四海蒼生翹首惠澤之久亟罷二奸別圖任用庶幾中興之業不愧于商周天下幸甚取進止八月

二十七日三省同奉聖旨徐處仁知東平府吳敏知揚州並放謝辭不候受告搬家接人疾速發赴新任靖康遺錄曰初驛召徐處仁于北京令星夜前來赴闕二十三日制以徐處仁為太宰兼門下侍郎處仁始為北京留守以剛廉自名因太學生言其可任遂以通奉大夫召入都人傾望咸謂有所建明既至當軸殊無嘉謀良策談者失望時中國多事符檄紛紛處仁不能決又與吳敏不協每朝罷議事互相詆訾未幾吳敏于東府

見處仁處仁方秉筆據案敏既坐有所咨啟語漸相侵處仁忿然以筆擲之正中敏面額鼻皆黑同坐者引去明日吳敏奏其事而御史亦相繼彈劾不踰月罷敏以少年多不習事胥吏將文牒至有所呈覆吳敏不能裁遣但云依舊例可也是時軍期緊急遽如星火敏不留意方具劄子乞令學者添治春秋又因司業楊時上言王安石三經新義邪說聾瞽學者致蔡京王黼因緣為姦以誤上皇皆安石啟之也又謂安石不當繼十哲宜

依鄭康成畫壁從祀上從其言下大學如敏所請時人  
有十不管之語云不管太原却管太學不管防秋却管  
春秋不管砲石却管安石不管肅王却管舒王不管燕  
山却管聶山不管東京却管蔡京不管河北地界却管  
舉人免解不管河東却管陳東不管二太子却管立太  
子蓋譏其不切事務故也咸謂深中時病 林泉野記  
曰徐處仁字擇之應天府人元豐八年登甲科累官為  
工部尚書大觀元年遷右丞梗正不阿俄丁母憂蔡京

罷相處仁奏十事乞留京士論醜之頻歷外郡有治聲  
靖康初召為中書侍郎俄代李邦彥為太宰時金人已  
入河東朝廷多故處仁奏陳八戒諫遊幸近習戚里佛  
道費用等皆遵而行之庶可刷金人深入之恥及金使  
來請和處仁請付种師道處置少宰吳敏主和議不允  
敏又差注親戚數人處仁抹去之由是不和加正議大  
夫與敏交爭於殿上坐是罷為觀文殿大學士提舉杭  
州洞霄宮退居鄉里敏亦罷去敵圍應天城中民作亂

目處仁為姦細劫奪其家資殺長子感病而卒年六十  
六子康度後皆顯仕 何臬中書侍郎陳過廷尚書右  
丞聶昌同知樞密院事聶昌自開封尹除同知樞密院  
事昌舊名山上嘗夢為兩日所逼乃改山為昌以厭之  
人皆莫曉其意或謂欲用山奉使金國乃改賜名又曰  
上一日謂聶山曰山大物也何以為名山曰臣素慕周  
昌為人乞改名昌於是奉御筆改名昌 勅朕為京師  
衆大之君是有獄市并容之寄卿發姦摘伏號稱神明

扶弱抑強濟以寬猛兼孔子果藝之選繼西漢趙張之  
餘載省風聲不忘嘉歎故茲獎諭想宜知悉 許翰罷

同知樞密院 李回簽書樞密院事 解潛屯兵南關

為尼堪所敗奔于隆德府解潛屯兵南關慮我師不用  
命乃置壘于溝壑之上且效淮陰背水欲使三軍殊死  
而戰尼堪軍兵垂至先戒兵將諭以禍福云迎敵者賞  
及子孫退走者誅及妻子或有竒功定加高爵三軍私  
語云向日童宣撫時亦有此言然戰死者申為逃走奔



潰者立賞招安今日之令又恐虛文是日敵方攻壘將  
兵果習舊態但畏敵人不顧軍令後軍乃縋深溝唯求  
自脫然壘中亡者不知幾千也金人乘亂鳴鼓而進我  
師大潰其敗軍覆將又非上賢時比也潛乃奔隆德府  
知威勝軍張堯佐叛降于金人 劉韜聞解潛敗奔回  
京師李綱頓兵懷州不進遺史曰劉韜聞解潛敗留張  
俊苗傅于信德府而走至京降八官落職罷之李綱初  
氣銳而輕敵潛既敗綱氣遂挫乃頓兵懷州不敢進日

與鄒柄張牧論事諸將稟事者先禱柄牧將士怨之初  
太原城中有將官楊可發者面有六字號為楊麻胡擦  
城出欲招集人解圍到虞縣約有衆千餘忽羅得三人  
乃繁時縣東諸豪傑不肯順番差往探太原事者可發  
遂隨此三人至五臺山北繁時縣東天延村招軍四十  
餘日得二萬餘人以五臺山僧李善諾杜太師為先鋒  
將到繁時縣東十里鐵家會遇金人大戰至晚衆皆散  
去可發却上五臺山副僧正真希投拜可發去五臺山

却入虞縣有衆二千遇尼堪大軍至可發自知其不可  
乃倚壁而立以鎗自刺其腹而死瘡口無血有白脂一  
塊隱出塞定瘡口至是解潛之兵潰劉鞆奔入京師李  
綱止屯于懷州金人縱橫于河東矣

五日戊戌察訪張灝會將兵駐于汾州遣統制張思正  
折可求冀景進兵于郭山柵

七日庚子尼堪兵破郭柵張思正冀景奔回張思正等  
屯郭柵深溝高壘未嘗料敵迎戰金人既近而冀景寨

中忽張青蓋敵視而不擊惟攻思正等寨矢石交射金人冒矢急攻寨中人兵退移竟為所敗惟冀景軍奔回兵死于寨中不知其數 彗出東北上深自內懼令宰臣議詔責躬放宮人減常膳求直言

八月辛丑以彗出下詔詔曰朕托士民之上嗣位旬日敵國侵凌乃至郊甸迨今三時邊鄙未寧調發轉餉勤動四方惟德不類無以仰當天心日夜祇懼每御便坐稀臨正衙凡欲以自奉者務貶損至于常膳百品減去

七十放宮女凡六十餘人未嘗輒奏音樂備置臺諫廣  
通言路公車上疏乙夜躬覽庶幾少自警戒而日者彗  
出東北方考之前載實為大異畏天之威弗敢寧處今  
將循舉故事而率皆已行深懼又不能應譴告之實孰  
憂再四意朕之不明元元之愁痛無聊者衆是求民之  
疾苦者悉行條具除等解燒冀以感召和氣以格休應  
咨爾卿士具體朕意毋忽 張灝招集潰兵誅冀景張  
灝出榜于諸要路招集兵將云近以郭柵之戰將兵非

不用命蓋緣敵鋒甚盛遂至敗事自統制下至兵卒並皆免罪如戰歿將校及重傷之人仰一一保明當議重行賞典如敢不來本司定行軍法自是兵將稍稍集于汾州諸互論不用命者又訴冀景有異意言金人既至乃於寨中張青蓋為號敵人不攻又見危不救而反奔潰灞遂下景等獄勘驗指實戮景于市死者五十二人十五日戊申張思正襲金人于文水縣獲捷

十六日己酉思正出戰我師大潰先是八月初劉韜兵

先進敵併兵禦之韜兵潰既而解潛與敵相遇于南北  
關轉戰四日殺傷相當金人增兵潛軍力不能勝而潰  
平定遼汾之師皆逗遛不進韜潛失利潰散之兵蔽野  
而還人人震恐獨思正之兵在汾州其衆尚十七萬號  
百萬未出戰敵曰韜潛既敗不足慮也乃驅婦女老弱  
守虛寨以當平定威勝之路而併其兵禦思正思正領  
兵出汾州執冀景示衆曰景不堅守石嶺關遁還者也  
斬之以徇是月十五夜敵于文水縣張飲以賞月謀者

以告思正襲之斬首數百幾獲嗣本嗣本脫去灝思正  
以小捷之故馳黃幟呼于路曰汾州捷報也州縣歡聲  
震地曰我師勝矣或持酒肴相慶曰皇帝聖慈吾見其  
太平乎至有感極而揮涕者十六日思正出戰敵曰彼  
衆雖多而喧囂不整無能為也乃以鉄騎三千直衝我  
師大奔相蹂踐而死者數萬人坑谷皆滿思正以敗卒  
數千人奔汾州灝以牙兵數百趨慈隰於是汾州威勝  
隆德晉絳澤州民扶携老幼渡河南奔者鉅萬計諸州



縣井邑皆空兵潰散不復入汾州咸歸元來去處或勸  
還司衆曰前日郭柵散察訪出榜招安云統制以下並  
免罪後復行誅戮今日還司是就死也不若權歸以俟  
再舉

二十日癸丑詔四總管許自選將兵以禦都城朝廷既  
知張灝等敗深慮金人深入詔四總管以兵禦都城張  
叔夜充南道總管高公純副之胡直孺充東道總管朱  
勝非副之王襄充西道總管孫昭遠副之趙野充北道

總管范訥副之

侍御史胡舜陟劄子論禦敵之策臣

觀漢唐以來禦敵之策有五曰和親曰守備曰征伐曰撫定曰羈縻皆因時而為之和親守備則施于敵國彊勝之時漢高帝是也撫定羈縻則施于敵國衰弱之際漢宣帝光武是也至于征伐或施于強或施于弱必先以中國富盛兵甲精銳我有萬全之勢彼有可乘之隙然後可舉漢武帝唐太宗是也今我國家承巨奸誤內侍持權之後海內虛耗帑藏空竭軍律不振士不為用

金人乘時肆其衝突馬驅乎中國圍守乎巨鎮而我動  
天下之兵斂四海之財不能少挫其鋒此則敵國強盛  
之時也彼強我弱征伐不可妄用而朝廷急欲解并門  
之圍不度彼已王師輕動於是种師中敗于榆次解潛  
敗于南關折可求敗于汾劉仲元敗于大安駙寶犯不  
韙自取挫衄以漢高祖之神武而又有謀臣猛將不世  
出之材破秦項如振稿猶甘受冒頓之困不敢與之校  
乃知敵國強盛制之當自有術不專以兵也所謂講和

守禦二策誠今日之先務朝廷先遣三使往議和好可  
為善矣更務自守二策並用善之善也伏觀今日命將  
出師悉援太原如救焚援溺其勢可謂急矣介冑之士  
孰不欲踴躍而前縉紳之士孰不欲抗議督戰然兵家  
善教見可而進知難而止不敢必也苟不可進必使之  
進猶羝羊觸藩何利之有徒喪軍氣非惟不足以救太  
原適足以取自弊之道兵寢單寡則有不測之禍不可  
不慮臣願陛下以漢高為法與之講和以漢文帝為法

自為之備詔宣撫司勿督諸將決戰且據要害堅壁固  
守以養士卒之銳氣竦彼有可乘之隙我有萬全之計  
相時而動以竒取勝天下幸甚昔突厥方盛唐太宗不  
得已而事之未幾擒頡利於北闕下敵國盛衰無常姑  
舍垢忍恥以俟之未為晚也臣自聞河東失利朝夕深  
思竊為計無出此者狂夫之言聖人擇焉伏望陛下斷  
而行之面奉聖旨令劉付諸將

三朝北盟會編卷五十一